

# 花嚴經入法界品十八問答

清涼國師澄觀述



花嚴經入法界品十八問答

①問佛說此經，要入師子嘖伸三昧者，何？

②答嘖伸者，即舒展通暢之狀，亦是震動縱任自在無畏之相，顯如來定即用之，體寂而造極，則差別萬殊，無非法界，即體之用，不為而周。故大小相參，緣起無盡，是曰自在，從喻為名，故云是也。

③問何故，佛入三昧後，普賢開顯放光，之後文殊述德？

④答入定顯理，普賢表理故。故放光顯能證智，文殊表智故。

⑤問地獄天子尚得頓超，何故二乘如聾如盲？

⑥答機有勝劣，為種別故。

地獄天子，昔聞圓法，植金剛種，今得遇光，頓超十地。

二乘小器，昔無大因，故對如來，不覩神變。

其猶雷霆震地，聾者不聞。日月麗天，盲者不見。

⑩逝多林，佛入三昧，作用無方，可得稱經。文殊從善住樓閣出，遊歷人間，既非佛會，何得稱經？

⑪答文殊從於本會流故。雖遍法界，而不離逝多林故。末後，善財亦於金剛菩提場，見普賢故。以本統末，故得稱經，展轉相推，成鈎鎖故。

⑫問何故，要有五十五善友？

⑬答顯五相故。云何五相也？

①初四十一人，明寄位修行相。寄於五位，顯修行故。

②摩耶下十一人，名會緣入實相。會差別緣，入幻智故。

- ③彌勒一人，名攝德成因相。攝上二義，為補處因，當得成佛故。
- ④文殊一人，名智照無二相。般若照極，反照初心，無二相故。
- ⑤普賢一人，名顯因廣大相。證入界一一行門，皆稱法界無邊涯故。

問何要五相？

答顯菩薩五行故。云何五行？

- ①寄位修行相，名高行，歷位漸行故。
- ②會緣入實相，名大行，入一實故。
- ③攝德成因相，名勝行具上差別，無差別故。
- ④智照無二相，名深行甚深般若，難測量故。
- ⑤顯因廣大相，名廣行一一之中，含容無外故。

①問善財，何以最初福城東，遇文殊耶？

②答表福德分善故，故在福城。東，為群方之首故。在東，表初起智明故，信心創立故。

③問會中，大機廣沙莫算。何故偏舉善財一人？

④答舉一例餘警未悟。此小童子尚能頓超，勉乎行人白首愧故。經云：「信樂堅固力，善財成此功，若有敬慕心，亦當如是學。」

⑤問十方賢聖，無處不有，何要南方？

⑥答有所表故。然有多意：西域人居宅，多向東。自東向南，順日月轉。表於善財，順人法故。餘如別說。

⑦問何故，文殊來，就善財諸友。善財往，何求耶？

⑩答表初心尚微，故菩薩大悲，不待請故。後約機就，為熏法故。乃至普賢，知識不就，善財不往，而忽得見，表法界位滿，無來去故。

⑪問諸善知識，皆遍通達。何要謙己知一、推勝、知多？

⑫答顯法界深故。乃至多意，略舉一二。

①為後之軌，令善財求法無倦，善友說法無悞故。

②顯勝緣，須善友故。

③破愚執，自師心故。

④破宅慢，今無偏執故。

⑤顯佛法，無有盡故。不應言「我已窮玄妙」。攝他屬己，不欲推人。

⑬問最初，令見德雲。法門無邊，何以先明念佛三昧耶？

⑩念佛三昧。功高易進，眾行先故。能通淺深，普收攝故。雙兼人法，消重障故。佛為勝緣，即心即佛，是一境故。

⑪第二海雲，何故聞法，復海中聞法耶？

⑫前友見佛，次友聽法，入要道故。

海中聞者，表於教法，從大悲中，之所流故。

⑬海雲說海中德，何故與十地中名，不同耶？

⑭十地，表佛智海，十地所依。今辨大悲，故不同也。

⑮後文殊師利，善財何故不見身相，但見伸手耶？

⑯表於智照，離身相故。而見手者，表依信心得至此故。經云：「若離信心，功行不具，不得成就諸功德。」故。

①問見普賢時，何以善財入其身中？

②答普賢，表法界。善財，證窮法界故。

③問普賢，何以不令見佛耶？

④答表於果海，離言說相故。又，表善財今生解行，至於後生聞果海故。

⑤問見五十五善知識，那過一百一十城耶？

⑥答一人當二分故。謂自分是一，推勝為二，以城鈎鎖故。又，要一百一十，表十地、等覺。一一具十，顯圓融故。三賢未證，攝屬地故。

## 花嚴經入法界品十八問答

受持及讀誦 讚歎並宣說 福慧俱增長 災障悉消除 現眷咸安康 先親得超昇 見聞與隨喜 皆共成佛道



妙法寺 香港新界屯門藍地 <https://www.mfbm.hk>